

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
18.10 सोमवार दिनांक 28.10.2024

प्रमुख समाचार –

- राज्य मंत्रिमंडल ह पंचायत अउ निकाय चुनाव म आने पिछड़ा वर्ग कल्याण आयोग के अनुसंसा के अनुसार आरक्षण देके निर्णय लेहे।
- राज्य म मुख्यमंत्री तीर्थ दर्शन के योजना सुरू करे जाही।
- मुख्यमंत्री विष्णुदेव साय ह प्रदेशवासी मन ले साइबर धोखाधड़ी ले सतर्क रहय के करे हे अपील।

मंत्रिपरिषद-निर्णय-01

राज्य मंत्रिमंडल ह पंचायत अउ निकाय चुनाव म आरक्षण के संबंध म आज बड़ा फैसला लेहे।

मुख्यमंत्री विष्णुदेव साय के अध्यक्षता म मंत्रिमंडल के आज रईपुर म होय बइठका म ए निर्णय ले गेहे कि अन्य पिछड़ा वर्ग कल्याण आयोग के रिपोर्ट अउ ओखर अनुसंसा के अनुसार त्रिस्तरीय पंचायत चुनाव अउ नगरीय निकाय चुनाव म आरक्षण दे जाही।

एखर तहत स्थानीय निकाय म आरक्षण ल एकुमस्त सीमा पच्चीस प्रतिसत ल सिथिल करके आने पिछड़ा वर्ग के जनसंख्या के अनुपात म पचास प्रतिसत आरक्षण के अधिकतम सीमा तक आरक्षण दे जाही। अइसने निकाय जिहां अनुसूचित जाति, अनुसूचित जनजाति के आरक्षण कुल मिलाके पचास प्रतिसत या ओखर ले जादा हे , उंहा अन्य पिछड़ा वर्ग के आरक्षण ओ निकाय म सून्य होही। फेर अनुसूचित जाति, जनजाति के आरक्षण निकाय म पचास प्रतिसत ले कम हे, त ओ निकाय म अधिकतम पचास प्रतिसत के सीमा तक आने पिछड़ा वर्ग के आरक्षण होही। फेर ए आरक्षण ओ निकाय के अन्य पिछड़ा वर्ग के आबादी ले

जादा नइ होही। निकाय के जेन पद मन म आरक्षण राज्य स्तर ले तय होथे, जइसे जिला पंचायत अध्यक्ष, नगर—निगम महापौर, नगर पालिका अध्यक्ष जइसन पद बर अइसे निकाय के कुल जनसंख्या के आधार म ए सिध्दांत के पालन करत आरक्षित पद के संख्या तय करे जाही।

मंत्रिपरिषद—निर्णय—02

मंत्रिपरिषद ह मुख्यमंत्री तीर्थ दर्शन योजना सुरू करे के निर्णय घलो लेहे। ए योजना के तहत राज्य के साठ बछर या ओखर ले जादा उमर के मनखे, दिव्यांगजन, विधवा, परित्यक्त माईलोगिन मन ल उंखर जीवन काल म एक घांव प्रदेस के बाहिर स्थित तीर्थ स्थान म एक या एक ले जादा स्थान के निसुल्क यात्रा कराय जाही।

मंत्रिपरिषद ह शिक्षक संवर्ग के संतानवे शिक्षक मनके स्कूल शिक्षा विभाग म संविलियन करे के अनुमोदन करे हे। एखर अलावा स्कूल शिक्षा विभाग के प्राचार्य मन ल साल दू हजार सात ले दू हजार उन्नीस तक पहिली मतांकन के आधार म प्रथम अउ द्वितीय समयमान वेतनमान स्वीकृत करे बर मात्र एक बार के छूट देके निर्णय लेहे।

मंत्रिपरिषद ह राज्य के नवा औद्योगिक विकास नीति के प्रारूप के घलो अनुमोदन करीन। ए नीति अवइया एक नवंबर ले लागू हो जही अउ इक्तीस अक्टूबर दू हजार उनतीस तक प्रभाव सील रइही।

प्रधानमंत्री—स्वास्थ्य सुविधा/सिलान्यास

प्रधानमंत्री नरेंद्र मोदी काली उनतीस अक्टूबर के धनवंतरी जयंती अउ आयुर्वेद दिवस के अवसर म नई दिल्ली म बारह हजार आठ सौ पचास करोड़ रुपिया के लागत के आने-आने परियोजना के उद्घाटन अउ सिलन्यास करही। ए परियोजना म छत्तीसगढ़ के घलो कुछेक परियोजना ल सामिल करे गेहे।

प्रधानमंत्री “आयुष्मान भारत प्रधानमंत्री जन आरोग्य योजना” के तहत सत्तर बछर अउ ओखर ले जादा उमर के सबो वरिष्ठ नागरिक मन बर स्वास्थ्य कवरेज के विस्तार के सुभारंभ करही। ए योजना के तहत सबो वरिष्ठ नागरिक मन ल स्वास्थ्य सुविधा दिलाय म मदद मिलही। प्रधानमंत्री भारत के पहिली अखिल भारतीय आयुर्वेद संस्थान के दूसर चरण के उद्घाटन करही। इही कड़ी म प्रधानमंत्री श्री मोदी छत्तीसगढ़ के बिलासपुर म सरकारी मेडिकल कालेज के सुपर स्पेशियलिटी ब्लॉक के घलो वर्चुअल उद्घाटन करही। उहे, प्रधानमंत्री रईपुर म योग अउ प्राकृतिक चिकित्सा के केंद्रीय अनुसंधान संस्थान के आधारसिला राखिन।

स्वास्थ्य सेवा ल अउ जादा अच्छा बनाय वाला ड्रोन प्रौद्योगिकी के अभिनव उपयोग ल बढ़ावा देबर प्रधानमंत्री ग्यारा तृतीयक स्वास्थ्य सेवा संस्थान मन म ड्रोन सेवा के सुरुआत करही। जेमा रईपुर एम्स ल घलो सामिल करे गेहे।

प्रधानमंत्री टीकाकरण प्रक्रिया ल पूरा तरह ले डिजिटल बनाके गर्भवती माईलोगिन अउ लइका मन बर यू-विन पोर्टल, स्वास्थ्य पेसावर अउ संस्थान मन म पोर्टल घलो लांच करही।

प्रधानमंत्री-रोजगार मेला

प्रधानमंत्री नरेंद्र मोदी काली वीडियो कॉन्फ्रेंस के जरिया ले नवा नियुक्त युवा मन ल इंक्यावन हजार ले जादा नियुक्ति पत्र बांटही। रोजगार मेला पूरा देस के चालीस जघा म आयोजित करे जाही। नियुक्ति पत्र पाने वाला युवा आने-आने मंत्रालय अउ विभाग मन म केंद्र सरकार के पद म नियुक्त होही।

नवा नियुक्त युवा मन ल आईगॉट कर्मयोगी पोर्टल म उपलब्ध ऑनलाइन मॉड्यूल कर्मयोगी सुरु करे के जरिया ले बुनियादी प्रसिक्षण लेके अवसर मिलही। ए पोर्टल म चौदह सौ ले जादा ई-लर्निंग पाठ्यक्रम उपलब्ध हे। ए पाठ्यक्रम डहार ले युवा मन अपन काम प्रभावसाली तरीका ले करे के संग जरूरी कौसल दूसर ल घलो सिखाही।

मुख्यमंत्री अपील

मुख्यमंत्री विष्णुदेव साय ह प्रदेशवासी मन ले साइबर धोखाधड़ी ले सतर्क रहय के अपील करे हे। मुख्यमंत्री ह किहीन कि आज कल साइबर ठग लोगन मनके पूरा जानकारी निकालके उंखर मनले फोन म अइसे बात करथे, जइसे उंखर परिवार के लोगन बात करत हे अउ अइसने ओमन ल ठगी के सिकार बना लेथे।

मुख्यमंत्री ह प्रदेशवासी मन ल आस्वासन देहे कि सरकार साइबर सुरक्षा ल लेके हर संभव कदम उठावत हे अउ लोगन मन ल ठगी ले बचाय बर जागरूकता अभियान घलो चलाय जात हे। ओमन ह सब झन ले आग्रह करीन कि कोनो भी संदेह वाला काल या संदेस के जवाब दे ले पहिली सावधान हो जाय अउ अपन व्यक्तिगत जानकारी झन दे।

मोतियाबिंद—कार्रवाई—निलंबन

राज्य सरकार ह दंतेवाड़ा म मोतियाबिंद सर्जरी म लापरवाही बरते के मामला म बड़े कार्रवाई करे हे। जिला चिकित्सालय म मोतियाबिंद सर्जरी बर निर्धारित प्रोटोकाल के पालन नइ करे म नेत्र सर्जन डॉक्टर गीता नेताम, नेत्र सहायक अधिकारी दीप्ती टोप्पो अउ स्टाफ नर्स ममता वैदे ल निलंबित कर दे गेहे। ए संबंध म जारी आदेस म केहे गेहे कि पाछू बाईस अक्टूबर के दंतेवाड़ा के जिला चिकित्सालय म होय मोतियाबिंद सर्जरी के दउरान मरीज मनके आंख म संक्रमण के घटना के संबंध म जांच दल गठित करके जांच कराय

गीस। जांच के बाद निलंबन के कार्रवाई करे गेहे। निलंबन अवधि म नेत्र सहायक अधिकारी दीप्ती टोप्पो अउ स्टाफ नर्स ममता वैदे ल दंतेवाड़ा के मुख्य चिकित्सा अउ स्वास्थ्य अधिकारी कार्यालय म अटैच करे गेहे।

एसआईआर भर्ती—परिणाम

छत्तीसगढ़ पुलिस म एसआई अउ प्लाटून कमांडर संवर्ग के भर्ती परीक्षा दू हजार इक्कीस के परिणाम जारी कर दे गेहे। एसआई भर्ती के परिणाम छत्तीसगढ़ पुलिस के वेबसाइट म अपलोड कर दे गेहे। चयन प्रक्रिया के तहत कुल विज्ञापित नौ सौ पचहत्तर खाली पद बर कुल नौ सौ उनसठ उम्मीदवार के चयन करे गेहे।

नामांकन याचिका—खारिज

रईपुर नगर दक्षिण उप चुनाव बर आज नामांकन पत्र के जांच करे गीस। इही बीच रईपुर दक्षिण सीट ले कांग्रेस प्रत्यासी आकाश शर्मा के नामांकन निरस्त करे बर भारतीय जनता पार्टी ह चुनाव आयोग ले मांग करे रिहीस। भाजपा ह आकाश शर्मा के नाम दू विधानसभा क्षेत्र के मतदाता सूची म होय के जानकारी चुनाव आयोग ल दे रिहीस। इही आधार म ओमन ह आकाश शर्मा के नामांकन म आपत्ति करत ओला निरस्त करे बर आवेदन करे रिहीस। ए आवेदन म सुनवाई के बाद चुनाव आयोग ह भाजपा के याचिका ल खारिज कर देहे।

ए उपचुनाव म छियालिस उम्मीदवार ह नामांकन दाखिल करे हे। उम्मीदवार तीस अक्टूबर तक अपन नामांकन वापस ले सकही। मतदान तेरह नवंबर के होही।

जानबा के मुताबिक भारतीय जनता पार्टी ह सुनील सोनी ल अउ कांग्रेस ह आकाश शर्मा ल अपन प्रत्यासी बनाय हे।

नालंदा परिसर—एमओयू

वित्त मंत्री ओपी चौधरी के उपस्थिति म रायगढ़ म नालंदा परिसर के निर्माण बर रायगढ़ नगर—निगम अउ एनटीपीसी के बीच बयालिस करोड़ रुपिया ले जादा के समझौता म हस्ताक्षर करे गीस। नालंदा परिसर के निर्माण एनटीपीसी के सहयोग ले करे जाही। एखर बर टेंडर के स्वीकृति दे जा चुके हे।

ए बेरा म वित्त मंत्री श्री चौधरी ह किहीन कि रायगढ़ ल विकास के नवा ऊंचाई म ले जाय बर युवा मन के सक्रिय योगदान होही अउ नालंदा परिसर एखर बर मजबूत बुनियादी तैयार करही। ओमन ह बतइन कि पूरा प्रदेस म आने—आने जघा मन म बाईस नालंदा परिसर निर्माण ल स्वीकृति दे दे गेहे। वित्त मंत्री ह किहीन कि नालंदा परिसर रायगढ़ ल एजुकेसन हब बनाय म मिल के पत्थर साबित होही।
